



---

猶未

---

獻予台灣的情批



自選五首

黃鈺婷(小鴨)

## 目次

光的旅行---記 6611666 陳澄波小行星 .....	2
學咱的話 .....	5
鳥的方向 .....	9
七股的熱天陷眠 .....	12
風咧吹.....	15

光的旅行---記 6611666 陳澄波小行星

畫筆拄拄仔因落來

日頭也略仔歇喘

遠兜的山

有暗色的面

街路的人

有緊步的形

毋知影彼日的光線

敢有適合寫生

若是有另外一个可能

伊無佇遐

只是去做逐日上愛的工事

掠光畫影

予日頭看顧

色水內面的熱愛恰完滿

熱帶的島 幔一軀燒烙的日光

毋是一片烏透紅的血色地毯

天星清冷 替墨色的時代篩光

思念跟綴眼神 寄附予彼粒星

星球頂面 畫家猶咧畫圖

日鬚照佇細粒子的所在

一工真緊

日子真長

光焯焯的圖面

毋知是毋是柑黃色的快樂

抑是弓蕉綠的自由

烏暗中有人用手指

來到面前 彼星光

彼光 佢位來的

彼光 經過啥物

彼光 繼落去 tueh

一站一站行翻頭

落尾欲走揣的

是可惜抑是希望

阮出世的時 伊已經離開

時間永遠無全步

光到位的這一秒 攏是歷史的跂跡

彼片

是你畫袂完的色盤

彼片

是合該然倚起的不平

彼片

是萬年久遠 光的旅行

總是有人會踮你的未來咧摸

一條光影的索

永久永久

苦難永久 熱情永久



## 學咱的話<sup>1</sup>

p 是飽 (pá) ，阿媽逐改看著我

攏會問一改敢食有飽？

伊身軀頂有一種甜甜的芳味

所以 ph 是芳 (phang)

伊微微仔笑，講我囡仔人愛鼻老人羶

m 是莫問 (mài-mñg)

阿媽，啥物是帶身命？

「囡仔人有耳無喙。」

b 是覘 (bih) ，嘛是無 (bô)

有一工舊厝的狗仔，毋知走去佗位覘

阿媽叫我免揣，彼無去矣啦

t、th 是等待 (tán-thāi)

風颭入來，囡仔等放假

大人咧等伊敢會轉回南

n 佇咧教室吵吵鬧鬧 (nāu)

老師猶未講煞 阮已經躡跂尾準備落跑

l 是老 (lāu) ，是留 (lāu) ，是落 (làu)

阿媽老矣，留佇內山

---

<sup>1</sup> 這首詩有受著林儀女士〈注音練習〉的啟發，在此致意感謝。

干焦我搬厝

我的尪仔落落去眠床跤

可能伊想欲留落來予阿媽攬

k 有家 (ke) ，嘛有奇怪 (kî-kuài)

新的家庭閣有新的教室

無全款的世界

愛沓沓仔習慣

kh 是上課的課 (khò) ，是考試的考 (khó)

是有看看無的看 (khuànn)

是委屈的屈 (khut)

是受氣的氣 (khì)

是孤尾的尾 (khut)

g 的語言 (gí-giân) 傷濁

我一開喙

眼神是箭 笑聲是刀

我佯顛佯戇

逐家攏愛文雅 (ngá) 的 ng

干焦我

愛硬拄硬

愛忤逆

因爲恁看起來攏比我較驕傲

ts、tsh 是走揣 (tsáu-tshuē)

昨日轉去內山

親情攏齊到矣

我想欲去揣阿媽

灶頭空空 今仔日無人煮食

s 是我上討厭的聲母，是相辭 (sio-sî) ，是往時 (íng-sî) ，是死 (sí)

聽袂著嗒嗒唸的聲嗽

袂閣有揜過來的私奇

到今我才揣著

鎖匙 (só-sî) 的 s

共思念寫落來的時

山佇遐 厝佇遐

心內的狗仔恰阿媽攏袂閣徙

日子 (jit-jí) 攏是對喙齒縫擠出來的 j

有忍

有字

有逐

一日一日 h 的跣跡愈來愈明

h 焘故鄉 (hionn) 恰香火 (hiunn-hué) 轉來

叫我學講阿媽的話 自頭開始

記持一聲一聲浮湧 是伊咧喝

莫拍毋見呢 咱的喙舌 咱的名字

你的名是韻母頭一个字

阿 (a) 阿媽

a、i、u、e

阿媽，伊，有，一个

我

喙舌離土的我

揣無腔口的我

oo、o

挖 (ó) 母語的土

學 (òh) 講咱的話

一聲一聲

一工一工

是想欲共你展寶

是閣想欲聽著

你的呵啉



## 鳥的方向

### 1. 火佇佗位

彼時，世界對海面瀟倚來

湧陵來到跂兜

島嶼的動物佻人 分享全一个聲嗽

霜凍無名

故事強欲吊鼎

遠兜山霧纓纏的空隙

有人看著火母的形影

水鹿接旨 蜚蜍應聲

火種猶原取袂著

紅喙 pit-á是上尾的希望

喙弄跂動翼展尾揀

火著矣 火著矣

傳說傳落來矣 佇上懸的樹椏彼 tah

### 2. 岫佇佗位

「一隻鳥仔吼救救，

三更半暝揣無岫。

啥人搥破伊的岫，

揣著絕對毋干休。」

世界爲啥物切做兩槩，你袂使問  
咱干焦是別人熱帶的夢土，你袂使講  
烏暗覘佇閣較深的暝尾，你袂使出聲  
路裡爲怎樣會破空流血，你袂使拆白

一隻鳥仔開喙唱歌  
細細聲仔 袂輸驚予人搜著  
救救 救救 咱的巢  
一句一聲 一个袂使放棄的名  
總算是活落來矣  
遮爾勇敢的鳥隻

### 3. 咱佇佗位

鳥仔欲展翼的日子  
烏雲佇海彼片 bih-bih-tshih-tshih  
日頭花一蕊一蕊  
倚倚倚來抹風濃雨  
交換十冬的恬靜  
  
烏影嘛恬恬收集箍子仔  
買收光線 買收厝瓦 買收濟濟的喙舌佻手囊仔

無意外 暝色愈來愈深

目睭仁煞攏黏佇愈來愈短の影像內面

險險烏有去的時代

烏仔又閣飛倒出來 喝咻四箍圍仔來相尙

一隻一隻 各種身份聲調齊齊無仝

毋管風聲剛洗 現實掉雨來淋

向望點予著 咱就毋驚

天穹有虹咧問

彼は siàng

歷史寫落來矣 島嶼の名毋願認命

咱是 siàng 咱欲去 tah

烏隻的翼股永遠飛向遮



## 七股的熱天陷眠

鹽埕下晡有做一个夢

伊真久以前是海

魚仔佇身軀邊咧整玲瓏

害伊惹神

對夢中浮倒起來

干焦白翎鷺會記持

伊的夢

佇遮石頭袂爛 毋過海水會焦

出脫的咒誓賸一半

愛人仔也留跡眠夢

一粒鹽的滋味

食一世人

日頭舖予平

等時間結晶

鹽花一蕊一蕊

開蹠咧納所費的批橐仔頂懸

落佇咧西北雨的大聲嗽內底

鹽擔仔一擔一擔拚

鹽耙仔那耙那沉重

白蔥蔥的夢

扛一代人

鹽埕下晡有做一个夢

伊真久以後嘛是海

蛇佻塑膠橐仔佇目睷前拍結

害伊拍咳嗽

夢隨散鼓

拋荒共日子食甲 賭水面一支電火柱

啥物都空

伊只好四界收鹽

太陽能電枋是外地人的鹽

黏佇王爺的喙鬚頂面是庄頭的鹽

生銹的鐵厝厝尾頂拏會出阿公的鹽

塭仔曝焦的時就有阿爸的鹽

媽孫仔久無見

熱怱怱的血液內底嘛有鹽

一代人有滋有味

靠一粒鹽

伊講 收收過來

共日子豉鹽

食老

才會回甘



## 風咧吹

風咧吹 吹啥物

吹向搬袂走的人

椅仔是伊捐的 柱仔是伊竝的

過年過節的禮品 碗頭仔頂面有伊的名字

出世的囡仔有伊送紅包

早時仔來量血壓的是伊

學生仔佻序大的中晝頓是伊煮的

校舍伊起的 電子烏枋伊用的 籃球佻場地嘛是伊設的

車是伊駛的 欲去的病院是伊開的

頭路和正港的打馬膠路

攏是伊造的

風頭水尾的所在

揣路的人

風 對面颺

風咧吹 吹啥物

吹向石磨仔心的人

一片是餓甲欲死的腹肚，一片是那嗽那曲痾的尻脊

心只有是愈挨愈 tīng-sin 愈磨愈細聲

若倚正片是買賣

若倚倒片是反背

手底有的

干焦風聲 罩霧

破厝宅

風咧吹 吹啥物

吹向雙重未知的人

佢講你知影啥

你知影你知影啥

毋過佢毋知影 啥物是佢毋知影的

一个影

會生出誠濟數字团

共影掠予牢 萬項控制佇管理系統內面

四界走跳就無所不能

風飛沙一日一日

每一日攏是合情合法合理

無人知影

食風愛食偌久

風才會停

風咧吹 吹啥物

吹向入發展教的人

都市恰庄頭落眠了後 定定做全一个夢

故事一定是對外位來的紳士 看著阮標致的面模仔

決心共伊的家伙家產攏搬來遮

替咱換一軀清氣整齊的洋裝

躑新起的樓仔厝

發展總是好的

散食人的未來傷歹落喉

入教總是好的

無論行到佗位攏無免躊躇

一四界相嚮

風透 hū-hū

無通閃

風 繼續吹

無一个人有通坐落

